

MI OMANS LA MONTES – la poeta Antonia Pozzi

Antonia Pozzi fova na poeta che ie nasciuda a Milan n l ann 1912. La ie chersciuda su te na familia che se n stajova bën y che ti dajova mpurtanza ala cultura y al'istruzion. Si oma, la cuntëssa Lina Cavagna Sangiuliani di Galdana, savova da rujené deplù rujenedes y la cunesciova la leteratura. Si pere fova n auocat.

Tl 1930 se à Antonia Pozzi scrit ite al'Università Statela de Milan per studië filosofia y leteratura. Do avëi fat n curs de fotografia viagiovela truep. Danter auter à la tl 1931 passà n valgun mëncs tla Inghiltiera: iló la ova mandà si pere che la stebe dalonc da , che fova stat si professëur de grech y latin tla scola auta y de chël che ëila se ova namurà. Nce ël la ova gën, ma, ma l fova n amor mpuscibl ajache l pere de Antonia Pozzi fajova dut per i teni adalarch davia che ch' l jëunn ne fova per ël nia de estrazion soziela bona y rica assé. Ti ani do ova Pozzi pona nce fat viages tla Sicilia, tla Grecia y t'l'Africa dl nord. Danter l 1935 y l 1937 à la vivù t'l'Austria y ti Paejes Tudësc per mparé mo miec la rujeneda y la leteratura tudëscia che la cunesciova bele. Si studesc à Antonia Pozzi stlut ju tl 1936 cun l titul de dutor.

La montes ovela bele mparà a cunëscer da pitla. Cun si genitores passovela ntlëuta si ferias a Pasturo, n pitl luech tl raion dla Grigna, t'l'Elpes bergamasches. Ma Pozzi cunesciova nce l' Elpes dl vest, la Dolomites y la montes dla grupa dl Brenta. La fajova jites y arpizedes che ti dajova esperienzes y emozions che la ne à nce plu tert mei desmincià. Chëstes à la elaborà te truepa de beliscima poejies che balestea danter la speranza y la tëma y che ie caraterisedes da si amor per la cuntredes y si jënt. Ma la poeta Antonia Pozzi ne possa nia unì limiteda a si poesies da mont – ëila ie al cuntrèr na scritëura che à trata tematiches defin universeles.

Dala trangujënza y dala mueia pervia de si amor mpuscibl, ma nce per la desperazion gaujeda dala ntraunides tla Talia fascista se à Antonia Pozzi tl 1938 tëtut la vita. La ova mé 26 ani. Scebën che si tëmpep d'atività poetica ne à durà che n diesc ani y scebën che la ne à publicà nianca una na poesia ntan si vita, ie si lirica ti ultimi ani unida scuvierta da nuef y la vën ncueicundi rateda una dla gran poetes talianes dl 20ejim secul.